

Visurum, & Laertiaden. Tibi ferta parabant
 Pulchraque Briseis, fidaque Penelope;
 Spectabatque alto gaudens te Pallas olympo,
 Ac Thetis in flavum Tybrin agebat equos.
 At nunc moerentesque dolent, frustrataque per te
 Vota timent, Latiumque utraque Diva fugit.
 Di meliora! abiit nondum spes; quin mage crescit.
 En exoratus jam mihi Pegasidum
 Munera, jam Charitum spondes, queis tuta sit Echo
 Vivere & innumeras possit olympiadas.
 Gaude Echo, o Siculi lusus gaudete poetæ,
 Palladia & Graii carmina Battiadæ
 Ingens partus honor vobis, multa addita formæ
 Gratia, jam nusquam est, si quod erat, vitium.
 Gaudia cur differs, pater optime! prodeat Echo;
 Prodeat at Musis facta beata tuis.

ELEGIA IV.

AD EUMDEM.

DE ALIO POEMATE A SE CONSCRIPTO,
 CUI TITULUS NAVIS AERIA.

Vocalem aonio celebratam carmine nympham
 Quæ prius (a) arbitrio supposuere tuo,
 En aliud, Raymunde, ferunt opus ex Helicone
 Adcitæ nostro nomine Pierides

(a) Eidem scripserat auctor Elegiam de illo suo libello, cui
Echo nomen.